

**Suliffeqarfissuit immikkoortortallit, suliffeqarfissuarni piginnittut aalajanger-simasumillu ingerlatsiviusut akornanni nakkutigisaasumik nussuisarnerit akiinik aalajangersaasarnerit pillugit malitassat nalilersoqqissaaqqullugit inernalu UKA2019-imi agguateqqullugu Naalackersuisut peqquneqarnissaa-nik Inatsisartut aalajangiiffigisassaattut siunnersuut (“Transfer-pricing”). Matumani siunertarineqarpoq akileraartarnikkut pilersarutipalaalersorsinnaanerit pinngitsoortinniarlugit malitassat sukateriffigineqarsinnaanerit, taassumalu ataani ulluinnarni ingerlatsinerit ataqqineqarnissaat**  
*Inatsisartunut ilaasortamit Henrik Fleischerimit, Siumut, saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerineqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Karl Kristian Kruse, Siumut, siulittaasoq  
Inatsisartunut ilaasortaq Aqqaluaq B. Egede, Inuit Ataqatigiit, siulittaasoq  
Inatsisartunut ilaasortaq Niels Thomsen, Demokraatit  
Inatsisartunut ilaasortaq Jess Svane, Siumut  
Inatsisartunut ilaasortaq Múte Bourup Egede, Inuit Ataqatigiit  
Inatsisartunut ilaasortaq Mala Høy Kuko, Siumut  
Inatsisartunut ilaasortaq Jens Napãtôk', Partii Naleraq

Ulloq 25. oktober 2018-imi siullermeerinninnerup kingorna ataatsimiititaliap siunnersuut misissorpaa.

#### **Siunnersuutip imarisaa siunertaalu**

Suliffeqarfissuit immikkoortortallit, suliffeqarfissuarni piginnittut aalajangersimasumillu ingerlatsiviusut akornanni nakkutigisaasumik nussuisarnerit akiinik aalajangersaasarnerit pillugit malitassat nalilersoqqissaaqqullugit inernalu UKA2019-imi agguateqqullugu Naalackersuisut peqquneqarnissaat siunnersuutip kingunerissavaa (“Transfer-pricing”). Matumani siunertarineqarpoq akileraartarnikkut pilersarutipalaalersorsinnaanerit pinngitsoortinniarlugit malitassat sukateriffigineqarsinnaanerit, taassumalu ataani ulluinnarni

ingerlatsinermi akuleruttussaataitaannginnerup ataqqineqarnissaa.

### **Siunnersuutip Inatsisartunit siullermeerneqarnera**

Siunnersuut taperserneqarluarpoq. Nuussinerit nakkutigisaasut pillugit maleruagassat naliliiffigineqarnissaat tapersorneqaraluartoq, nalilersuinerup qaqugu naammassineqarsimanissaa isumaqatigiinngissutigineqarpoq.

Naalackersuisut allannguutissatut siunnersuutaat una oqallinnermi amerlanerussuteqartunit taperserneqarpoq:

Ingerlatseqatigiiffiit suliffeqarfissuarnut attuumassuteqartut, aktianik amerlanernik peqartut ingerlatsiviillu aalajangersimasut akornanni nakkutigisaasumik aningaasanik nuussisarnerit akigititassaannik aalajangersaanissamut maleruaqqusat nalilersorneqarsimanerannik Naalackersuisut agguuassiniissaat pillugu Inatsisartut aalajangiiffigisassaattut siunnersuut ("transfer-pricing"), imm. UKA2018/191 pillugu siunnersuummi maleruaqqusat ukiuni tallimani atuutereerneranni nalilersuisarnissamik imalik. Siunnersuuteqarnermi siunertarineqarpoq annikinnerusunik akileraaruteqarniarluni akileraarutit pillugit annertuumik pilersarusiornissat pinngitsoortinniarlugit aalajangersakkat, tassunga ilanngullugu naalackersuinikkut akuliuttussaanninnermik tunngaveqarnissamik malinninnissamut maleruaqqusat sukaterneqartariaqarnersut aalajangiiffigineqarnissaat.

### **Ataatsimiititaliap siunnersuummik suliarinninnera**

Ingerlatseqatigiiffiit il.il. ingerlatseqatigiiffissuarmut atasut akornanni nakkutigisaasumik nuussineri akiniq aalajangersaanermut "Transfer pricing" tunngassuteqarpoq.

Nakkutigisaasumik nuussinerit inerteqqutaanngillat. Tassa illuatungeriit attuumassuteqanngitsut akornanni nuussinerit naammassineqareerneranni anguneqarsimasinnaasut naapertorlugit akit atugassarititaasullu aalajangersarneqarsimappata. Tamanna ima paasillugu; akuliuttussaanninnermik periutsimik taaneqartartoq malillugu ingerlatseqatigiiffiit iluuseqassasut.

Tamatumani iluanaarutiniq nuussinissamut, taamaalillunilu isertitat akileraaruteqaataasussat killilersimaarneqarnissaannut, nammineq akigititanik atugassarititaasunillu ingerlatseqatigiiffiit atuinissaasa pinaveersaartinneqarnissaa siunertaavoq. Taamaattoqartarnera akileraannginnissaq siunertaralugu pilersarusiornermik taaneqartarpoq.

Ingerlatseqatigiiffiit aalajangersimasut nunatsinni akileraarutissaminnik annikillisaaniarlutik

akileraanginnissaq siunertaralugu pilersaarusiortartut amerlasuunit isumaqarfigineqarnerat siunnersuuteqartup siunnersuumminut tunngavilersuutigaa.

Tassunga atatillugu Naalakkersuisut siullermeerinninnermi akissuteqaamminnut atatillugu Akileraartarnermut Aqutsisoqarfiup nalilersuineranik pissarsiniarsimappata soqutiginarsimassagalarpoq. Tamatumani siuliani allassimasutut paasinninnerup ilumut tunngavissaqarnersoq paasiniarlugu – taamaassimappallu ajornartorsiutip qanoq annertutigisutut tagginneqarnera.

Taamaaliortoqangimmat ataatsimiititaliaq eqqoriaaginnarsinnaavoq. Isumaqarnarporli akileraartarnermut inatsimmi aalajangersakkat atuuttut naammattutut isigineqangippata maleruagassanik allannguinnissamut (sukaterinissamut) Akileraartarnermut Aqutsisoqarfik nammineerluni sulissutiginnissimassasoq. Taamaattumillu aqutsisoqarfiup ajornartorsiutip ulluinnarni sulinermi misigisartakkat tunngavigalugit akileraartarnermut maleruagassat Akileraartarnermut Aqutsisoqarfimmit ingerlaavartumik nalilersorneqartarnerata ilimagineqartariaqarpoq.

Tassunga atatillugu aningaasarsianit akileraarutit pillugit Inatsisartut inatsisaanni § 36 a aamma § 36 b, (akissuteqaat naapertorlugu) nakkutigisaasumik nuussinertit pillugit pissutsinik pingaarnertut maleruagassanik aalajangersaasut, 2007-imi 2017-imilu kingullermik allanngortinneqarsimasut oqaatigineqassaaq. Kingullermik pisoq højesteretimi eqqartuussummut qisuariaatitut. Periuseq atuuttoq, eqqartuussutip nalorninarsisita, allannguutikkut inatsisikkut aalajangersaganngortinneqarpoq<sup>1</sup>.

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuut Inatsisartuni oqaluuserisassatut saqqummiunneqarpoq<sup>2</sup>. Siunnersuutip nassataraa § 36 b-p annertuumik allanngortinneqarnera, tassani (immikkoortumut matumunnga akissuteqaat naapertorlugu) ilaatigut nakkutigisaasumik nuussinertut atatillugu uppersaasaasiinissamut maleruagassat sukaterneqassallutik. Taamaalilluni suliffeqarfiit aningaasaqarnikkut aqqissuussaanerisa niueriaasiisalu paasisaqarfiginerunissaannut Akileraartarnermut Aqutsisoqarfik periarfissaqarnerulissasoq naatsorsuutigineqarpoq, taamaalillunilu aamma nuusseriaatsit akuliuttussaanginnermik periutsimik malinninngitsutut aarlerinaateqarsinnaanerpaat nakkutigineqarnerisa salliutinneqarsinnaanerata ajornannginnerulissalluni.

Illuatungaatigulli nalinginnaasumik nassuiaatit naapertorlugit allassimavoq<sup>3</sup>:

<sup>1</sup> UKA 2017/145-p pingajussaaneernejarnerani allannguutissatut siunnersuummut nalinginnaasumik nassuiaatit (qup. 2 -3).

<sup>2</sup> Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2018-imeersoq. Aningaasaqarnermut Naalakkersuisumit saqqummiunneqartoq. (UKA 2018/191).

<sup>3</sup> UKA 2018/191-imut nalinginnaasumik nassuiaatit (qup. 19 -20) (Iluarsissut).

*”Ilaatigullu suliat annertussusaata apeqqutaasarnissaa eqqunneqassammat, suliffeqarfeqqat suliffeqarfissuillu uppersaasiisarnissaat pissaaq, taamaammallu suliffeqarfeqqat, nunani allani suleqatinik nakkutigisanik nuussisut **uppersaasiisarnissaasa oqilisaavigineqarneranik** inatsisissatut siunnersuut nassataqassaq.”*

[ataatsimiititaliap erseqqissaanera]

*”Suliffeqarfinnilli minnerusunik atuutsitsinnginneq **Kalaallit Nunaanni suliffeqarfiit ikittuinnaat annertuumik uppersaasiisarnermut nalunaarutikkut aalajangersarneqartussamut ilaanissaannik nassataqartussatut naatsorsuutigineqarpoq.**”*

[ataatsimiititaliap erseqqissaanera]

Taamaakkaluartoq inatsisissatut siunnersuut nakkutigisaasumik nuussinernut maleruagassanut patajaallisaataasoq, taamaalillunilu akileraannginnissamik siunertaqarluni pilersaarusiortarnermik akiuniarnermi sakkussat ilaneqartut ataatsimiititaliamit tatigineqarpoq.

Maleruagassat pillugit UKA 2019-imut nalilersuineramik suliaqarnissaa naapertuutissanngitsaq inatsisissatut siunnersuut innersuussutigalugu Naalakkersuisut tungavilersuutigaat. Taamaalillunilu inatsisissatut siunnersuut akuerineqarpat nakkutigisaasumik nuussinerit pillugit maleruagassat 1. januar 2019-imi allanngortinneqassapput, tamatumalu kingorna nalilersuinerup saqqummiutinnginnerani maleruagassat sunniutaat pillugit misilittakkat killeqassallutik. Taamaattumilu allannguutissatut siunnersuummik, naliliinissamut piffissaliussap kinguartinneqarnissaanik siunertaqartumik Naalakkersuisut saqqummiussipput.

Allannguutissatut siunnersuut siullermeerinninnermi amerlanerussuteqarluartunit taparserneqarpoq. Tamatuma akerlilernissaanut ataatsimiititaliaq tungavissaqanngilaq.

Allannguutissatulli siunnersuut ataatsimiititaliamit taparserneqarsinnaanngilaq. Tamanna inatsisissatut siunnersuummik aalajangersimasumik (UKA 2018/191), inaarutaasumik qanoq iluseqarnissaa akuersissutigineqarnissaalu suli ilisimaneqanngitsumik, allannguutissatut siunnersuummi innersuussuteqarnermut atatillugu isigineqassaaq. Tamatuma peqatigisaanik immikkoortumut matumunnga akissuteqaammi allassimavoq nakkutigisaasumik nuussinernut maleruagassat aningaasarsianit akileraarutit pillugit Inatsisartut inatsisaanni pingaarnertut, aammali allani ilaatinneqartut. Tamannarpiarlu pissutigalugu siamasinnerusumik oqaasertaliinissaq ataatsimiititaliamit kaammattuutigineqassaaq:

**Suliffeqarfissuit immikkoortortallit, suliffeqarfissuarni piginnittut aalajanger-simasumillu ingerlatsiviusut akornanni nakkutigisaasumik nussuisarnerit akiinik aalajangersaasarnerit pillugit malitassat taakkulu aqutsivigineqarnerat nalilersoqqissaqqullugit inernalu UPA2024-mi agguateqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut (“Transfer-pricing”). Matumani siunertarineqarpoq akileraartarnikkut pilersarutipalaalersorsinnaanerit pinngitsoortinniarlugit malitassat sukateriffigineqarsinnaanerit, taassumalu ataani ulluinnarni ingerlatsinerit ataqqineqarnissaat.**

### **Siunnersuutip aningaasaqarnikkut kingunerisassai**

Inatsisartut suleriaasiat naapertorlugu aalajangiiffigisassat siunnersuutip piviusunnngortinneqarnerani aningaasaqarnikkut allaffissornikkullu kingunerisassat siunnersuummut tungavilersuutini allassimassapput. Tamanna naapertorlugu siunnersuuteqartup nalunaarjaa nalilersuineq AC-p ukiup affaanik sulineranut (250.000 kroner) pisortat aningaasartuuteqarnerannik nassataqassasoq nalilerneqartoq.

Allatut isiginninnissaq Naalakkersuisut tungavissaqartissimangikkaat ataatsimiititaliamit maluginiarneqarpoq. Tassunga atatillugu ataatsimiititaliamit tutsuigineqarpoq apeqqut Naalakkersuisunit sukumiisumik isumaliutigineqarsimasoq aammalu siunnersuut siuliani nassuiaatigineqartut saniatigut aningaasaqarnikkut allanik nassataqassanngitsoq. Naatsorsuutigisaq akimorlugu siunnersuut pisortat karsiisa aningaasartuuteqarnerunnerannik nassataqassagaluarpat aningaasartuutit taakku aningaasaliissutaareersut iluini akilerneqartariaqassapput, tamannalu suliniutinik allanik tunnulliussinermik nassataqartariaqassaaq.

### **Ataatsimiititaliap inassuteqaatai**

**Allannguutissatut siunnersuut Aningaasaqarnermut Akileraartarnermullu Ataatsimiititaliamit saqqummiunneqartoq akuerineqassasoq ataatsimiititaliap isumaqatigiittup inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Karl-Kristian Kruse  
Siulittaasoq



Aqqaluaq B. Egede  
Siulittaasoq tullia




Niels Thomsen



Mala Høy Kuko



Jess Svane



Múte Bourup Egede



Jens Napátók